



La Quotidiana
7000 Cuera
081/ 544 89 10
<https://www.suedostschweiz.ch/laquoti...>

Medienart: Print
Medientyp: Tages- und Wochenpresse
Auflage: 3'626
Erscheinungsweise: 5x wöchentlich

Seite: 3
Fläche: 63'029 mm²

Auftrag: 3009371
Themen-Nr.: 140.008

Referenz: 81514760
Ausschnitt Seite: 1/2

Promtas da cuntinuar

L'emprega «Stad da Glion» organisada dil forum per la cultura dalla pasch ei ida a fin la sonda vargada. En cumpleina cuntentientscha dallas soras dominicanas dalla claustra da Glion che han mess fil en guila per igl avegnir da lur Casa da sentupada.



Sora Monica dalla cuminonza dominicana dalla claustra da Glion ei part dil forum per la cultura da pasch e satisfatga dil spért dalla occurrenzas dalla jamna vargada.

FOTO ANDREAS CADONAU



ANDREAS CADONAU/FMR

Cun il bratsch pusau sin la balustrada ei sora *Monica* sepostada per schar fotografar. Ei ha fatg la pareta che quella luccadad seigi buca giugada, mobein part dil spért dallas soras dominicanas dalla claustra da Glion. Cun certs fatgs ha la sora dominicana buca stuiu vegnir confruntada la fin dalla jamna vargada sin la terrassa dalla Casa da sentupada: La media da vegliadetgna dallas soras dalla claustra da Glion ei aulta e dapi 30 onns ha ei dau neginas novas entradas ella cuminonza.

Encuretj ina via nova

Dad ina nova strategia per la Casa da sentupada han ins pudiu leger en in communicau. Sora Monica ha declarau la nova strategia. «Nus havein stuiu anflar enzatgei durabel, enzatgei che sesviluppescha e viva el mument che nossa cuminonza ei buca presenta pli.» La veglia da prender enta maun igl avegnir ei perdetga dad ina admirabla vitalitad, malgrad la vegliadetgna dallas soras. Auters havessan probabel schau esser bien e surschau igl avegnir al destin. Sora Monica ha tschintschau da resca e curascha. «Secapescha che nus havein duvrau sustegn d'ordlunder.»

Bein colligiada

Ina impurtanta part da quei sustegn d'ordlunder ha medemamein priu plaz la fin dalla jamna vargada sin la terrassa dalla Casa da sentupada. *Lea Suter* ei gest vegnida dad ina occurrenza ed ei stada sin via alla proxima. Occurrenzas ch'il forum per la cultura dalla pasch ha instradad la jamna vargada a Glion. La dunna giuvna ha gia luvrau per las Naziuns Unidas a Geneva ed ei bein colligiada cun organisaziuns nunguverna-

mentals (NGO). Suenten in'egliada sin sias reportaschas ord differentes encardens dil mund cun ina populaziun maltarschinada da conflicts hanai capechan ins l'expressiun da Lea Suter: «Jeu sun ina nomada.» Che la nomada ha anflau la via a Glion ha era da far cun corona. Sora Monica ha menziunau quei temps che ha sfurzau biars da far in paus. «Quei paus ha simplificau ad entgens exponents dil forum da luvrar per la «Stad da Glion», in event instradad per gronda part sur contact virtual.»

Negin aungel dalla pasch

Lea Suter ha schau negin dubi che la «Stad da Glion» dalla jamna vargada ei buca in eveniment unic. «Clar, nus cuntinuein e planisein a liunga vosta.» La dunna che tgamuna il forum per la cultura dalla pasch ha dau d'entellir da buca esser: «In aungel dalla pasch che sgola per il mund entuorn.» Ella ha getg dad esser bein conscianta ch'ei drovi conflicts ella veta per sesviluppar. En quei senn ei la cultura dalla pasch ina cultura, co tgamunar conflicts, e Lea Suter vul integrar la regiun ellas stads da Glion. «Proximamein vegnin nus ad analisar la «Stad da Glion» vargada e far emprems patratgs nua e co instradar midadas.» Sora Monica ha visitau bia occurrenzas dalla jamna vargada ed il spért dallas scuntradas ha fascinau ella. La sora dominicana ha regurdau als 800 onns dapi la mort da sogn Dominicus, il fundatur digl uorden dominican. «Jeu sun fetg satisfatga ch'igl ei reussiu dad instradar in event el spért da nossa cuminonza, occurrenzas aviartas a tuttas organisaziuns e religiuns.» E la sora dominicana ei perschuada che buca mo la Casa da sentupada dallas dominicanas po profitar dalla «Stad da Glion», mobein l'entira regiun.